

六

齋

卑

議

平陽縣志本傳

宋衡原名存禮改名恕後改名衡字平子號六齋

陳哲宋徵君年譜

生

時尊長夢燕故小字燕生

卑議自序

萬全鄉鮑陽人

父賓家

年邑

廩生喜宋五子書以公方信鄉里邑有公善無不與

冊約採勸

衡

幼有異稟讀書過目成誦八歲在塾瑞安孫鏞鳴過其家奇之

妻以女

年譜

九歲能爲古今體文談論經史卽每與宋元人立異

年十四見王陽明遺書深喜其反心不安雖言出孔子未敢以

爲是之說

卑議自序

十六爲邑諸生

年譜

是時瑞安孫衣言鏞鳴兄弟

方以陳傳良葉適之學誘勉後起衡旣從受其學而衣言子詒

讓治訓詁學絕精兼通佛典其同邑金晦治顏元顧炎武之學

卑議自序

陳黻宸治鄭樵章學誠之學

陳虬治蘇軾陳亮之學虬

兄國楨治易象數兼禪學皆與講問大義多所啟發

卑議自序

而超

悟詣極往往不爲古人所蔽

參陳詩宋徵君事略

光緒丙戌年二十五丁

父憂遂僑寓瑞安爲游學計明年從外舅鏘鳴於上海龍門書

院又明年於金陵鍾山書院皆襄閱課卷庚寅游湖北謁兩廣

總督張之洞說以變法不聽登黃鶴樓賦詩見志是冬出使俄

德奧荷欽差大臣許景澄奏辟爲隨員病不果行壬辰游京師

謁大學士李鴻章一見咨賞以限於資格委充水師學堂漢文

總教習乙未在上海襄閱求志書院課卷辛丑在杭州任求是

書院漢文總教習壬寅禮部侍郎朱祖謀以經濟特科薦丁母

憂不赴癸卯游日本

年譜

覘風土諮學術越歲乃還

陳詩宋徵君事略

乙

巳應山東巡撫楊士驤聘任總務處議員兼文案宣統元年歸

里明年卒年四十有九

年譜

衡自移家瑞安輒頻年浪迹江海自

楚浙燕齊外以居申江爲最久交游名士徧海內益博覽四部

籍及近譯歐美人所著書包涵兼綜自成一家之學

參年譜卑議序纂

大旨以顏習齋爲能接孔門卜夏氏之傳黃梨洲爲能接言游

氏孟輿氏之傳世苟以黃說爲體顏說爲用則大同可幾豈但

小康哉

卑議前序

遂本其意著爲書曰高議有申周學重孔問篇明

今所謂漢唐宋學非周以前之學孔子廟問項橐以譏今士之

失問謂學亡於秦問亡於漢又有君道吏道篇至欲廢官制去

階級蓋無政府主義其持論較鄧牧心伯牙琴爲尤激子道婦

道篇闢三綱忘六情似莊生至樂之說每與人言輒撓世怒遂

火其榮

年譜

別爲卑議四篇六十四章上二篇二十五章指病下

二篇三十九章擬方自序謂指病不及本擬方多據亂故命之

曰卑

卑議自序

意固謂有政本之改革爲大同之政見在也

生年

痛詆洛閩之學爲陽儒陰法以爲儒術之亡極於宋元之際神

州之禍極於宋元之際苟宋元陽儒陰法之說一日尙熾則孔

孟忠恕仁義之教一日尙阻

卑議後序

其所抱之學說政見大概如

此是時漢學多趨枝末春秋公羊學方盛行

纂

衡譏切之曰洛

閩禍世不在談理而在談理之不公不在講學而在講學之不

實近時通人救以漢學風氣既成華士趨名乃始以談理爲厲

禁講學爲大詆且以實踐爲迂以躬行爲腐以信厚爲可笑以

淫盜爲無傷敗羣壞俗聲望反隆及其聞政事發論議則又莫

不影響疏舛苛刻躁妄陰中洛閩之毒無殊帖括之儔若斯之

倫而號曰漢學夫豈創始通人夢想所及者歟

卑議漢學篇

又云春

秋文簡師說絕異三家以外尙有鄒夾公羊述義亦有未安時

賢既欲盡黜諸家獨尊一經於此一經又欲盡黜他家獨尊一

傳則其流弊又狹陋矣

留別杭州求是書院諸生詩注

凡此諸說皆爲平實

衡文和雅類東漢人不矜華藻而雅有典則歌詩靜穆多似宋

人

陳時宋徵君事略

所著又有浙學史永嘉先輩學案朝鮮大事記闢

中原人荒議各若干卷在燕箸津談十六篇是歲中日失和師
徒大潰因箸籌邊三策在齊輯條陳政要爲山左陳言錄若干
卷其女昭又哀其詩文爲六齋有韻文集無韻文集各若干卷
衡無子以三弟子佩璫爲嗣蚤卒女一卽昭衡卒時以遺箸付

焉

譜年

光緒癸巳十有九年僉曲園師書後

嘗讀後漢書王符仲長統傳所載潛夫論昌言諸篇輒歎誦不置以爲唐宋以後無此作也不圖今日乃得之於宋子燕生蓋燕生所爲卑議實潛夫論昌言之流亞也其意義閎深而文氣樸茂異時史家采輯登之國史亦可謂甯固根柢革易時弊者矣惟變通篇三十七章鄙意以爲宜緩出之其造端閎大者固未必即能見之施行瑣屑諸端不知者且謂妨於政體竊謂君子之論論其大綱而已孔子富之教之兩言千古不易三代以上聖人治天下以此即漢唐以來凡治天下亦以此然何以富之何以教之則孔子不言也一國有一國之富教不能通於他國一時有一時之富教不能概於他時至孟子屑屑然論之即如方里而井井九百畝此或可施於七十里之滕耳齊梁大國

能用之乎而况後世乎易曰窮則變變則通不變固不能通而
變之實難是以君子慎言之也燕生屬序其端余謝不敏竊書
其後云爾曲園居士俞樾

六齋卑議

宋 恕 燕生

巨清光緒十有七年宋恕箸卑議四篇六十四章於亞細亞洲東海之濱成以質其師曲園先生先生譽之然戒曰是宜緩出恕敬受戒然漸聞於世索觀日衆宋恕之友謂宋恕曰今天子聖神公卿大夫士莫不相與議兵刑錢穀學校教化之事子盍出子之議以備擇焉宋恕謝曰今天子聖神公卿大夫士莫不能通兵刑錢穀學校教化之事安用宋氏卑議爲宋恕之友曰雖然其亦盡吾心焉詩不云乎詢於芻蕘子之議甯不足比於芻蕘與於是乃取舊稿稍加改削印行問世而重爲之敘曰宋恕年十九受大儒顏習齋氏之書於外舅止庵先生止庵先生兼治百氏不專宗顏宋恕亦兼治百氏不專宗顏然心以顏氏

爲接孔門卜子夏氏之傳弱冠後見浙西李壬叔氏所序德國
學略扶桑岡本子博氏所撰萬國史記及南楚郭筠仙氏扶桑
岡鹿門氏之緒論悄然以悲泣數行下曰嗟乎素王之志今乃
行於海外哉今乃行於海外哉已而又得見大儒黃梨洲氏之
書且喜且泣曰悲夫言子游氏孟子與氏之傳在此矣此剝之
所以復否之所以泰唐虞三代之所以盛而美英日本等國之
所以四民樂業月異日新者也苟有權力者咸克以黃氏之說
爲體以顏氏之說爲用則大同其幾乎豈但小康哉卑議之箸
緣起具於前敘上二篇二十五章指病下二篇三十九章擬方
指病不及本擬方多據亂故自命曰卑雖然其諸不謬於儒術
而不見斥於黃氏顏氏之徒者與其諸可告無罪於言氏卜氏
孟氏者與其諸陳於空山吟於荒野可使恒河沙數之冤魂沈

魄感而夜哭聲連千里不能休者與孟氏曰人皆有不忍人之心先王有不忍人之心斯有不忍人之政詩曰莫赤匪狐莫黑匪烏今天子聖神執政多仁蓋遠於北風所譏其有願行不忍人之政者乎其甯無取於斯議焉

光緒二十有三年去箸書時七年宋恕自敘印行緣起

卑議篇章名次

民漠篇第一章十

患貧 盜賊 旱潦 士妖 庶莠 僕役 胥幕 賦稅

釐鹽 刑威

賢隱篇第二章十五

塾課 教官 書院 科場 小楷 養望 洛閩 漢學

文詞 外務 歲月 用違 傳舍 政本 山林

變通篇第三章三十七

師範	四科	博文	開化	學會	取士	議報	樞部
閣院	華銜	民政	軍政	九曹	鄉聚	聽訟	輕刑
司捕	懲罪	重祿	停捐	泉幣	醫藥	道路	水火
三業	箸書	正名	廣譯	圖籍	服色	旌表	倫始
析承	救慘	節漸	同仁	禮樂			

基礎篇第四章二

更律 帥信

都四篇六十四章

廣白

此書著於光緒十七年故所論政事截至十七年爲止現雖稍加改削而大體仍還原書之舊故不能增論十七年以後之政

事

鄙人箸此書非欲借爲入仕之媒亦非欲盜取一時之譽徒以躬處奇艱傷心同病惻隱未絕不忍無言明知空言雖切無補蒼生等諸候蟲時鳥自鳴自己耳

無量劫無量世界莫不有物斯莫不有人莫不有人斯莫不有國莫不有國斯莫不有政政之宗旨不出兩途曰富強曰治平若神州之儒教印度之佛教宗旨皆在治平故與法家若婆羅門若可蘭宗旨在富強者勢必冰炭運丁其否則宗旨在治平者必不得執政此孟子所以困於齊梁鶡冠子所以窮於南荆陸宣公司馬溫公之倫所以掣肘於唐宋者也此書雖未嘗不談富強然宗旨在治平與法家富強之說絕異巖穴高士幸勿臆同宗旨在富強者之談而不屑披覽

此書篇章名數及其中字句皆鄙人一手所定自首篇首章首句至末篇末章末句毫無謬於宗旨自相矛盾之處所謂一家之言與道聽塗說剽襲影響者絕異苟海內外通人欲正其失敢請屈尊先閱敍言再將四篇六十四章逐字過目然後賜正若不屑細閱偶見一二句或一二章遽加攻難則鄙人所弗敢聞命

英美等國治內之法合於公理者殆十六七或且十八九至其外交之法則公理尙止十合三四其不如英美等國者無論矣此書專論內治故於英美等國有嘉無貶非不知其外交之未能盡絕妬忌陰險之習也彼中公理家固多譏切政府者矣域外諸國或近海或遠海昔魏默深撰圖志概指爲海國貽笑域外三尺童子今公私文字皆指外人爲洋人指外交之務爲

洋務夫洋者海也非不美之名用之無當於貶外而徒招不識字誼不見地圖之譏奚而弗正其名歟若斯之類此書皆不敢沿誤誠懼外人之譏笑辱我神州也

外國爲非臣僕我皇朝者之總名歐洲爲五大洲之一名今人動輒混言外國若歐洲法良意美試問東南洋諸食人之國及非洲諸以人祭祖之國非外國乎土耳其非歐洲之國乎且歐洲中最治之國尙不及墨洲中最治之國何獨慕歐洲乎此書實事求是凡言外國之法良意美必指實某國或某某等國或白種諸國懼善惡混也

由我帝京向西繞行一周則俄英屬地爲近西而朝鮮日本爲遠西向東繞行一周則朝鮮日本爲近東而俄英屬地爲遠東明乎地圓之理則知域外諸國無不可指爲西國亦無不可指

爲東國而奈何專指白種諸國爲西國其人爲西人其法爲西法其學爲西學乎此書實事求是凡有所指概不泛用西字八旗禁旅駐防營制餉需等舊章應如何變通之處非草茅所敢妄議懍遵國法概從闕如

此書宗旨雖在治平然所擬之方於治平實際不過得半故命曰卑議願通人高士曲鑒區區

都十條

民瘼篇

患貧章第一

夫民爲邦本本固則邦無危象食爲民天天足則民無離志自古及今未有十室九空而不釀亂家給人足而不成治者也是以百姓不足動有若之嗟訓農通商致衛朝之富海外望國深

明斯理故極力求富而藏之於民蓋與法家富國之旨殊矣法家

富強之旨與儒家富強之旨判若天淵孟子最深於富強之學商鞅亦深於富強之學然而萬無可通者旨殊也咸同

以來弊政滋甚橫征內困互市外漏農田水利之制苟焉弗修天地自然之藏尙多未發禮義生於富足凍餒忘其廉恥詩云民之貪亂甯爲荼毒可爲寒心者也

盜賊章第二

昔惠人遺戒明火烈之功嚴尹信罰息犬吠之警道德齊禮其風渺矣刑以止盜又可弛歟夫爲盜之樂十倍良民自非必懲富猶易犯何況貧驅爭趨奚怪今盜律非不嚴捕官非不多也然而首善之區驕肆尤甚中原庶族十九業斯黃河南北跬步荆棘大江之表較爲樂土然劫竊之事亦無日無之役有私例仰贈陰護官有同情諱劫細竊豈盡亡良均非得已被盜之戶

苟乏奧援訟必無幸勢使然矣蓋聞海外望國道不拾遺門不
閉夕雖以異族子軀深閨弱質獨行千里無虞暴客偶有盜案
登即破獲相去何遠抑有由歟詩云流言以對寇攘式內又云
式遏寇虐慴不畏明能無望焉

旱潦章第三

大小諸川時常泛溢高原燥區又苦屢旱更相爲虐循環不休
哀鴻滿地良堪惻隱夫水旱之降世以爲天然人事未修豈宜
委數夫種樹以潤空氣理著於西書鑿井以引源泉效彰於東
國皆防旱之至術化磽之良方至如境內有浸因而善用則幹
流支波但能爲益而淹稿之災兩可無虞忘所當盡動輒言天
但求暫安計不及遠坐使父老幼孤頻遭於慘亡田園室廬恒
懼於不保斯乃仁人所流涕志士所撫膺也昔堯有九年之水

湯有七年之旱以今方古未爲甚烈然情隔於代遙痛深於目
擊詩云周餘黎民靡有孑遺先王詞意迫切若此閨中遂遠誰
上流民之圖公等慈悲甯勝籌賑之舉永慮長策更待何人

士妖章第四

號士者流倚厥章服舞弄刀筆橫暴邑里庶民畏之目爲訟師
訟師之强有力者聲氣廣通震懾守令例案特熟挾制院司一
喜一怒萬戶股栗生人死人操其毫端弱無力者揚威數村稱
雄九族良懦被虐厥痛均焉夫察拘文嚴褫刑懲重猖獗至此
其故安在蓋由庶鮮識字士罕讀律鄉議無權官護可恃夫趨
榮遠枯者有生之恒情悲貧慕富者含識之公理今韋布之士
謀食奇艱一尺青氈大費延譽晝劬夕悴肘見踵決猶多上闕
甘旨下窘號啼甕牖繩樞絕望高軒之過貨錢假粟動遭市人

之辱而彼業訟師者或等列庠校或屬在世年非有公卿之職而門疑要顯非有黃白之術而財足揮霍居則煥館涼臺適體於冬夏出則狎客健僕導隨於前後鮮衣怒馬親戚讓途沈飲縱博衣冠滿坐積貲購仕仕貲相長輪蓋耀宗田宅利子苟非上哲相形難堪是以效尤波靡守節風微巧取豪奪各矜名家誦詩習禮競用發冢遂使農販之儔腹誹孔孟以爲一號爲士便不可近詩云士也罔極二三其德玉石同譏誠憤切於身受惡聒於耳聞也

庶莠章第五

古稱十室之邑必有忠信今則三家之村必有地棍或練習拳勇動輒毆人或包藏禍心專喜敗事或陰結訟師奉令承教或顯交胥役揣瘦量肥或驅率悍貧騷擾懦富或依託勢富欺壓

弱貧或羣行郊野截亂婦女或私立規例強派農商鳥獸光化
滅理若斯魚肉善良觸目皆是夫耕夫織婦獲利甚微小販之
艱亦不可說辛勤一生致富能幾稍有盈餘便愁虎視食不甘
味寢不安席一夫發難厚賄乞哀懦聲播揚外患紛起今日輸
幣明日割地楚敵未乾秦兵又至不忍忿忿背城一戰胥役訟
師每多助棍敗者十七勝者十三正使得勝訟費浩繁而彼地
棍充其受懲不過笞繫笞不知愧繫即獲釋既釋之後仍復來
擾終當賄和以靜門戶至或彼係戚族或此乃孤寡則勝敗之
數尤與情違弱貧被壓苦倍茲焉今民鮮不思去鄉井慕趨公
門實業憚修游惰日衆驅於地棍亦一端歟詩云大風有隧貪
人敗類又云民之罔極職涼善背誰之咎也

僕役章第六

內僕外役倚官作威名則不齒實則極樂僕權倍主役權侔僕氣懾本管各署之常芸芸四民輸其膏血不義致富或逾王侯姑論州縣門僕歲入動數千金多且萬計更名報捐轉瞬顯仕明暗諸役千百爲羣此輩性行本鮮良善一來作役濡染益非朝得官票儕偶相賀暮宿村店勢燄便張所至之家奉若神明酒食之外索獻錢幣若係紳戶稍不敢逞若係農販雞犬一空欲壑不滿輒行毆毀鄰舍代哀必遭株蔓詈人祖父以爲當然辱人母妻亦復時有及原被到案勝敗旣分爲筭爲繫令出於官掌筭掌繫權操於役其筭也勝家預賄則計十肉飛敗家預賄則呼千皮存其繫也勝家預賄則桎梏私加敗家預賄則眠食使適至於捕官之役翼庇盜徒刑官之役勒買刀數尤駭初聞豈勝痛哭夫教養之道曠代失修民生今日爲善實難半畝

之宅良莠雜處一門之內苦樂懸殊不平之端何日蔑有原其始意皆欲訟官繼念得直與否尙未可知衙役臨提先受騷擾遂爾隱忍不發抑鬱終身或乃不顧生存含悲引決老成家法以守怯爲宗閭里格言以勿訟爲要得聞於官萬不能一聞而得直百不能一詩云哀我填寡宜岸宜獄握粟出卜自何能穀匹夫匹婦制於強暴乏財而訟鮮不危躬沈冤幽恨充塞天地僕役之爲禍烈哉

胥幕章第七

夫貴賤之品以才德爲衡輕重之任以貴賤爲次斯固用人之雅素理國之經常今時所睹大異是焉修撰編檢其名甚貴然尺寸之柄不以相假各署胥吏其名甚賤然威福之權乃與之共就中權重莫如部胥舞文弄法父子傳家曲出深入黑白變

色司員多貧每仰河潤潤既及矣勢難持正其廉公者又多愚直疎於例案昧於情弊欲駁不能受欺不覺七堂人雜兼差政繁畫諾惟命不知何事官反爲吏吏反爲官名實相戾一至於此外署吏權稍輕於部然督撫之吏奴視鎮協布按之吏踞見守令提學之吏陰操黜復知縣之吏半握賦訟無署無吏無吏無權并爲一氣毒遍赤縣夫僕役等輩皆有傳人胥吏雖賤尙非其比甯無君子出於其中然衆寡之數殆懸絕矣在昔漢氏郡縣稱朝妙選鄉望以充曹職士吏合一猶有古風蓋嗜利之心有生同患欲遏其流惟持名念是以古先哲王用名範俗夫苟任之則宜貴之旣賤之矣豈宜反任彼之來充固非爲名惟利是圖又焉足怪至若刑錢劣幕盤踞挾持尋其殃民或甚胥吏望卑分尊賞罰不及苟弗改律未如之何律之弗改雖貴吏

名亦恐無益詩云誰能執熱逝不以濯胥幕之熱生於法家濯之濯之其必以儒歟

賦稅章第八

今京祿奇薄專仰外贈外官費繁特剝軍民剝民大宗基於州縣州縣四應取諸賦稅天浮徵勒折律有明禁然爲今州縣苟遵律言不能終日故浮勒之禁徒存其文浮勒之實仁者不免但仁者爲之較有限制而服官之子中人爲多當其未仕非不慕廉笑罵貪酷亦出真心及親其境公私交逼環顧同儔莫不浮勒倍徵浮也數倍亦浮倍折勒也數倍亦勒人之欲錢苦不知足既必破律自專計利計心一起多多益善由有計心漸入貪境由有貪心漸入酷境陷溺日深殊不自覺遂至紛提孤寡頻飛雷火之籤大索契憑不恤脂膏之竭指正人爲漕棍視農

戶爲奇貨僻左之地愿樸之鄉賦稅苦民尤不可說但獄不繫
尙得清名夫今之州縣風莫下矣苟苦民之事止於賦稅目之
爲清固亦近似然清者若此濁者奚如詩云爲民不利如云不
克黔黎之苦何其極歟若夫京外舊關掌稅官吏無殊劫盜則
更可悲者矣

釐鹽章第九

相沿虐政莫甚官鹽近創虐政莫甚釐捐夫鹽於民生每飯必
俱質本極純而官雜之味本極美而官惡之價本極賤而官貴
之仇彼私販號之曰梟水陸置兵專司截殺鹽官橐溢譽滿區
中鹽犯人微死者山積又動指買私牽連破產使富苦勒派貧
苦淡食吁可悲矣釐捐之法效從洪逆數十年來設卡日密抽
捐日重去釐遠矣徒仍其名總辦分委得檄色喜巡丁司事入

局顏開索賄橫行人理幾絕觸怒勒罰千百任倍寸絲尺布隻雞斗酒苟無私獻亦不能過至乃家船載水投石中流村婦裹糧奪囊當路傾貲斃命輕若鴻毛或弗能忍聚衆毀卡徒受誅夷隨毀隨設計臣憂餉豈暇恤民詩云廢爲殘賊莫知其尤鹽哉釐哉稍有人心莫不切齒嗟彼創者持者加者獨何心歟彼方號曰大儒號曰良臣然則釐鹽之虐豈有窮期歟抑豈獨釐鹽然歟昔漢代賢良力爭鹽鐵宣公溫公痛斥聚斂儒哉儒哉

刑威章第十

古先哲王制刑禁暴父子兄弟罪不相及誠以堯朱反性周管殊情各事其事同惡蓋鮮自公理漸晦高位多憂刑以鋤忌非以禁暴懼報親仇計出網盡秦漢之制動輒三族元元之苦蔑以加矣皇朝定律大致沿明相及之法尙未削除假有柳下之

聖必蒙盜跖連枝之戮蔡仲之賢終以郭鄰遺種而錮二百年
來抱恨何限若夫各署審案恒用酷刑逼招使被誣良民求生
不能求死不得必承乃已既承之後曰磔斬絞惟上所定是以
九州之內無力之民莫不日夜自危常恐禍及詩云謂天蓋高
不敢不局謂地蓋厚不敢不踣又云戰戰兢兢如履薄冰悲夫
使三代遺民至此極者非鞅斯也歟

賢隱篇

塾課章第一

孔孟教旨晦於秦後然漢唐諸儒辛苦傳經微言大誼多藉以
存厥功偉矣自洛閩師弟以不學之軀肆口標榜張其謬說奇
淫以來宗之取士功令之文必極腐陋又極纖巧乃爲合格禁
引子史禁涉時政忌諱深重法限嚴苛於是民間塾課專錮聰

明墨守是督博覽是戒有好讀古書者父兄以爲大戚有稍講世務者庠序以爲大怪連上犯下銷磨銳氣細腰高髻挫折英才少壯精力既竭於茲先入爲主神昏已久通籍晚學暇晷難得自非上智焉克有成昔賢斥洛閩爲洪猛等八股於焚坑夫豈過歟

教官章第二

童生入學進身始基今之教官所教何事橫索冊費罔恤破家教之貪酷乃無遺義優劣生員匪文匪行惟愛惟憎屈膝道府乞憐州縣無所不至庶幾稱職吾見罕矣夫進士舉貢今之所謂正途也而生員者正途之所從出也教官者生員之坊表也教官不可問而生員不可問矣生員不可問而進士舉貢不可問矣進士舉貢不可問而通國之政治不可問矣

書院章第三

今自京師以至縣城皆有書院以課功令文大率朔官望師貧士恃膏獎爲生課案操榮辱之柄苟能實事求是尙或有小補焉乃今縣令以上概多不學無聊署客候補僚屬苟且閱課所延院師非其親故即以陋例師課公明百難得一官課公明千難得一夫書院非尊爵之區院師非贈好之物表既不端景焉不曲浮薄之子負笈萃處永晝縱博長夜羣飲甚或圍調婦女朋擾市肆淫盜顯行無復羞惡其號稱攻苦者終日呻吟不出三科之墨窮年塞杜甯聞四部之名哀哉書院或以爲自放之場或以爲自囚之獄雖多奚益可爲太息者也

科場章第四

今京員十九奇貧幸得試差陋規不多難補生計若鬻科名則

數萬之金或可立致少亦數千雖畏彈劾發覺甚稀冒險圖利
常人之情倘差以賄得則更所必至外省分房例用知縣候補
窮困尤恃鬻薦提學豐於陋規最少鬻榜鬻乃叢幕復有非鬻
而以情贈鄉會試官或憚閱卷每募生員詐充隨丁入內代閱
應募之人皆極無恥而操重權其餘場弊無涉閱卷又不勝舉
大小試場卷多限促掌試之官雖一目十行萬難遍閱縱極公
明失人猶多况公明者晨星落落數百年來通人節士遇合恒
艱勢固然歟

小楷章第五

殿試一甲世以爲至榮修撰編檢之職世以爲至貴然問其所
以得之者小楷也苟小楷不工雖有經天緯地之學沈博絕麗
之文不能得焉優拔貢生之朝考也亦以是爲等差遂使京外

風氣特重楷課慕妍恥醜舉國若狂疲心手於點畫擲光陰於臨摹器求精佳或歲費中人之產形尙滯俗并大失書家之意此事無謂最爲淺顯諸公衮衮想莫不知徒以忌諱未開論對必泛千篇一律無可甲乙聊憑小楷亦豈得已類此者多悉屬病標致病之本盡於忌諱矣

養望章第六

編檢史職也館中之課宜以史論今課詩賦於誼何取昔如司馬長卿之賦猶或譏其諷一勸百揚子雲之賦猶自悔曰壯夫不爲況命以腐泛之題專尙頌揚之巧乎蓋漢末置鴻都之學儒臣非之唐宋以聲律取士君子病之今八股爲害既甚聲律幸脫八股之繁復爲聲律所困自非曠世逸才有聞頓悟更以何暇細治實學切究時務養望之地識議井蛙偶出鴻通必被

衆謗曷足怪乎立法初意固欲其愚不然夫豈不知聲律之無用也

洛閩章第七

儒家宗旨一言以蔽之曰抑強扶弱法家宗旨一言以蔽之曰抑弱扶強洛閩講學陽儒陰法談經則力攻故訓修史則大謬麟筆誣貞詩爲邪淫醜詆夏序惡禮運之聖論敢擯游傳自謂接孟實孟之賊背此聞誅一夫之說樹彼臣罪當誅之誼背此殃民不容之說奉彼虜使其民之教道統帝統日事忿爭上智上仁悉遭橫貶貪祿位而毀高隱畏刑戮而毀孤直憚讀書而毀通人短用武而毀良將善均而出於其黨則極稱之出於非其黨則深刺之惡均而出於其黨則曲諱之出於非其黨則痛斥之嫉妬阿私但務尊己強詞拒辨薄弱厚責忠恕之風於斯

蕩然末流虛僞益甚詐僞益多廉恥全亡惻隱盡絕而憑藉巍科依倚貴勢詛頌程朱以媚當時竟得號爲理學之魁儒林之特者自元明來何可勝道哀哉理學乃藪逋逃彼真理學安得不滅跡埋名空山夜哭尙友兩生神交沮溺也

漢學章第八

洛閩禍世不在談理而在談理之大遠乎公不在講學而在講學之大遠乎實近時通人救以漢學實事求是考據精詳寸積銖累艱苦卓絕有功古籍良非淺鮮然諸通人譏切洛閩惡其談理之不公非惡其談理也惡其講學之不實非惡其講學也及風氣既成華士趨名於是漸多但治小學而不治經史但閱序目而不閱原書之輩此輩胸中恒乏理解乃始以談理爲厲禁講學爲大詬然猶藉曰空談不如實踐口講不如躬行未敢

公然踰閑蕩檢及老師益遠大誼益微於是輕薄少年紈袴子弟或稍識篆刻或家富舊槧莫不依草附木自號漢學則且以實踐爲迂以躬行爲腐以信厚爲可笑以淫盜爲無傷敗羣壞俗聲望反隆及其聞政事發論議則又莫不影響疎舛苛刻躁妄深中洛閩之毒無殊帖括之儔嗚呼若斯之倫而號曰漢學夫豈創始通人夢想所及者歟

文詞章第九

昔周之季諸子競鳴學有是非文皆精妙各抒心得所謂文質彬彬者也漢唐作者尙多如是宋元以降浮僞日滋羣昌黎之詞例闢佛老學彭澤之句陽慕耕桑質之不存文類誹矣千年積重牛耳爭持丹素相非罕秉公論駢散異製同歸誣民無題入集自命才人諛墓之外甯有餘業比文章於鄭衛賤庶子之

春華招侮有由負斯文矣

外務章第十

趨時之子競談外務終南捷徑富貴反手夫外務至難通也能通外務未必能兼通內務也是以東鄰師西內務外務分省建官分門取士我則不然自好之流恥談外務談者類多鄙夫聞者驚若河漢彼於外務何曾稍通委之外交已爲大誤矧使治內固宜殃民夫右行文字豈異倉造歐墨情形遠殊禹域縱精識右行不過如六書名家筆追希臘不過如愈翔學古無關經濟猶甚昭顯況乃音氣粗諧文字極淺生長赤縣而未知唐虞三代之名游歷諸洲而未解星地一物之理蠢如鹿豕殘如虎狼而執政者尊之過孔子信之過鄒衍使得厚誣西人肆行虐政假公肥己罄竭脂膏咎有所歸彼甯足責歟

歲月章第十一

人之建立氣爲之先氣之爲物有若潮汐當其盛時殆不可遏
及其既衰欲振良難故及鋒而用則懦者亦奮過時而試則奇
者亦庸今京外漢員多苦需次或數十年杳無差缺淪落之賢
何處蔑有或蘊管孫之術而不得參一議抱頗牧之略而不得
乘一障名登仕籍實均被褐慷慨抑鬱流涕太息朝朝覽鏡夜
夜撫劍日月逝矣歲不吾與門巷蕭條積感於苔草室人交謫
疲慮於米鹽馮唐易老賈誼早衰驅邁之氣何能不挫挫盡之
後乃始任之債負督償兒孫掣肘循常守陋遂同碌碌大言無
實貽誚庸夫原其至此可悲甚矣

用違章第十二

人各有能短長不掩用當其能則意開事舉用違其能則綱弛

目亂故滕薛大夫不宜於公綽漢家丞相無取於絳侯昔在帝堯之代益稷並稱假使益教稼則樹穀之效未必如稷也假使稷掌火則烈澤之效未必如益也及觀仲尼之門由求齊魯假使由爲宰則足民之效未必如求也假使求治賦則知方之效未必如由也近世人材每傷用違精神弗出功業弗彰用違之過亦一端歟

傳舍章第十三

春秋之世去古未遠尼父之聖絕後空前故三年有成可以自信世異春秋聖非尼父雖握全權致治猶緩矧乃牽制萬狀稍展孔艱欲以倉卒有所移易其又焉能今督撫布按乍秦乍楚豈無豪英意圖興革舊案如山未易遍閱屬官如海未易周察軍民利病未易灼見水土美惡未易洞悉至於州縣席暖尤稀

勉強引端求行其素志從容竟緒難望於後人昔子產爲鄭武鄉治蜀與入之情始怨終德蓋凡近之舉奏功可速遠大之謀收效必淹今官如傳舍仕多賈心有創莫繼反成弊政與憎我以口實抱遺恨於畢生是才敏之子恒存自便懼來軫之不遵奉因循爲至諛夫以今之牽制萬狀稍展孔艱雖使尼父久居一職阻力太厚甯遂厥圖然增秩不徙猶或小補更調頻數小補亦幾絕望可哀也已

政本章第十四

樞府大差號爲相職然宰相之實惟王足當餘旗漢員乃相之相夫相之相焉能行志六部書侍部各六人又加管理敵體互掣縱擅大略難展寸長况多兼差署所懸隔晝夜馳走何暇問政夫草茅賤族循資平進得至書侍年皆垂暮正使無敵體之

我掣無兼差之馳走精力已衰猶必廢弛而况困之以紛掣疲之以馳走世家宗戚左右指揮壞道拙車震傷腦智其入直樞府者又加風雪早朝勞形拜跪之苦乎夫樞部者政之根本雖有賢聖極其位分不過長部參樞局外之人罕能設身處地動援前代輔佐以相責望豈知定職初意固非願其興除夫以發政言之則根本在樞部樞部今若此矣以及民言之則根本在州縣州縣今何如哉品卑壓重動輒獲咎雖專城居猶難施布若夫衝要之區冠蓋多經上官所駐觸怒尤易往來如織銷暑於送迎監臨如麻短氣於伺候無聊酬應窮日不足雖使言必作宰恭寬綰綬亦豈能不權侵於僕役政委於幕胥也

山林章第十五

祿利之途奔競舉國孤芳自賞代不乏人懷玉藏珠恥於求賈

飯疎飲水安於處貧如斯之流良宜搜採夫虛聲純盜誠哉可
輕然抱道不羣豈真無有古先哲王首崇隱逸卑辭厚幣惟恐
拒招非但假其風節以勵貪頑固將用其謨猷以新治化自蒲
輪之典久絕於中林曠世之才多老於空谷友麋鹿以畢生與
草木而等腐坐視同胞傷心何極昔尹耕莘野三聘始出說築
傅巖圖求乃來向使尹說生於今世甯屑簡練揣摩希場屋之
遇趙趙嘖嘖遊公卿之間耶其亦長爲農工而已

變通篇

師範章第一

宜徵通人撰蒙師鐸小學必自二書蒙師鐸宜極簡要小學必
自宜采古經傳中平正顯切語及內外國界學白種政治學物
理學之略頒行天下每縣城設延師公所一區經費派捐縣貧

者暫借神祠由本縣議院紳生

議院別章

公舉品學兼優者爲師董

欲爲蒙師者無論流土均須報名公所候董面試史論時務論各一首除不取外取者等四榜之公所差其脩額欲延蒙師者向所指延師董分別着購蒙師鐸小學必自二書該師到館後如有背鐸中語及不以必自教徒情事由該東白董遂師訪實摘名如公所無名之人私教十六歲以內子弟倘有與東徒爭毆等情到官但依凡判不以師論其品學特著人所共知不來

報試者師董徑列甚名

日本及歐美諸國皆有師範學校茲略師其意

四科章第二

各處書院師宜改由本處議院紳生公延無論大紳布衣聽擇課題改分性理古事理今事理物理四科性理題出諸孔孟老莊及印度波斯希臘猶太諸先覺師徒經論古事理題出諸內

外史傳今事理題出諸現行律例現上章奏及外國現行律例
年季旬日各新聞紙物理題出諸新譯歐美人所著各種物理
書四科輪課文任駢散無論何人均許應課院師許用公文與
大小印委官相往來彼此概稱照會院生中優者由師開單照
會督撫提學童生升作附生貢監廩增附生均升作舉人舉人
升作進士有職銜者升一實級依銜改實再登照會者遞升膏
火獎賞由各處自酌多寡之數書院二字於誼欠合宜改依日
本稱學校各處舊學有名無實宜改稱祠令署舊學職宜改稱
祠令專司孔祠祭掃

博文章第三

亞洲文字赤縣印度二種行最廣和文乃赤縣文之別子獨行
於日本一國然近時日本學業大興譯著之盛爲亞洲所未有

多用和文歐洲文字英法二種行最廣英文尤廣遠過赤縣印
度二種則居今之赤縣而謀新民必以多開和文英法文學爲
要義矣今宜令各疆臣通飭所屬守令立即擇董籌捐於各城
建和文或英法文小學校一區限二年內辦竣師徒之數聽各
議院紳生視捐項多寡酌定延師或西或東或本國亦然地太
僻惡無師肯來者暫緩建校給資願學者遊學創置和英法文
學生員由提學招考取充一體應歲科考鄉試按今歐洲諸國
平常士商往往
兼通同洲異國文字我與印度波斯等國同洲而今舉國無識
印波等文之人江浙極博金石家所見僅及同人在亞洲東南隅
而又同文同教之朝鮮交趾日本而英法金石家至有能讀埃
及巴比倫之古碑者此非赤縣學士之性皆安陋惡博與歐人
殊也勢之艱
也政之綱也

開化章第四

白種之國男女識字者多乃過十之九少亦幾十之二黃種之

民識字者日本最多印度經英人弛平民及女子識字之禁後
識字者今亦得百之四赤縣秦前學校最盛男女無不知書秦
後頻遭慘劫劫餘之族日以昏愚計今識字者男約百之一女
約四萬得一去印度尙遠况日本與白種乎識字者之少如此
民之積困安有解期今宜取法日本下教育令令民男女六歲
至十三歲皆須入學不者罰其父母每縣鄉聚連鄉聚別章均置男
女校各一區校費派捐於本縣鄉聚連校師公舉於本縣鄉聚
連課程酌集外國之長讀本專用赤縣之字按今日本小學教法先授和文後授
漢文若師其意江淮以南須創造切音文字多種以便幼學茲事體大未敢議及民生六歲入連校連

校中優者升入聚校聚升鄉鄉升縣如是遞升以至京校依日本
本科舉法某學有成給某學士某學博士名號女子一體給與
男女滿十三歲願出學者任便創辦時本鄉聚連無可舉之師

暫許外延女師難求女校暫許延男師人之生也得母氣居多
女不可不學尤甚於男愚民之主皆以絕女學爲要義故秦一
統漢繼之而赤縣女學遂幾絕彼印度之禁女識字其尤甚者
耳

學會章第五

今日本及曰種諸國皆任官民男女立會講學學會因以繁興
目別不可勝舉其大綱有天地人哲史文律農工商醫之分學
會最多者其國最治次多者國次治最少者國最不治無學會
者國不可問矣今宜播告天下許官民男女創立各種學會學
會興則君子道必日長小人道必日消而山澤盜匪之會自將
解散於無形矣

取士章第六

學校既開十年之後人材蔚起可以盡廢舊取士法專行新取

士法

新取士法
見開化章

十年之內勢難盡廢舊法宜變之以漸生童院

試鄉會試均照舊舉行惟命題改分四科

四科別章

任應其幾提學

主考改由本省京官疏薦總裁改由各省督撫布按疏薦以登薦最多者充之鄉會房校改由總裁主考自辟不論何人皆許登薦辟鄉會取中者之三場文字及落卷之總主房批榜後由知貢舉監臨悉數即行發判印布批語背謬許被擯者呈控查辦省殿試分甲即按會榜名次一甲以樞員用二甲以大中小知縣用三甲以部曹閣書用優拔貢朝考亦改命四科題如會試朝考取中者亦稱進士一體分甲擯者視同舉人一體會試武科改以左傳史記孫子題論爲首場德國陸師英國水師日本水陸師章程題爲次場弓矢刀石爲三場武生武舉願應文鄉會試者聽

議報章第七

學校議院報館三端爲無量世界微塵國土轉否成泰之公大網領今宜詔求英德法美日本等國議院報館詳細章程徵海內通人斟酌妥善與學校同時舉行三大綱領既舉則唐虞三代之風漸將復見英德法美之盛漸將可希矣

白種之國獨俄羅斯無議院故俄最不治黃種之國獨日本有議院故日本最治然俄國雖無議院尙有學校報館不治則不治也然而異乎黃種不治之國矣

樞部章第八

軍機處宜改名總理處以副其實設缺實大臣四員參議三十員主事百員不兼別職差以專其責六部裁吏部戶部改理財部禮部分爲二曰禮樂部文學部兵部分爲二曰陸軍部海軍部刑工二部仍舊增置醫部共爲八部尙書侍郎名不副實宜

每部改設正卿二員副卿四員卿以下分上中下大夫上中下士六級部卿須由下士漸升升降不出本部惟可內改總處閣院閣院別章及外改總督以下吏部既裁用人之權歸總理處八部卿議院大學士管部差宜裁

閣院章第九

內閣專備顧問宜設實缺太師傅保各一員大學士十員學士五十員中書百員宗人府宜改名宗務院總理各國事務衙門宜改名交鄰院以副其實此二院合理藩院都察院稱四院除此一開四院不屬八部外其餘衙門院寺等悉行裁省分屬八部所有卿使統領等缺悉改部大夫卑秩悉改部士如步軍統領宜改爲

陸軍部京城司捕上大夫大理寺卿宜改爲刑部司平上大夫餘依此

華銜章第十

宜改翰林院大小職名爲清華之虛銜以寵賜京外各官之治
行優異者不設實員如今宮銜今太子太師等職名爲職而實則銜所有該院
例辦諸事改歸內閣院中大小現員悉數量改樞部閣院各職
及外職

民政章第十一

行省之名緣於京省京省既無行名安立減行稱省於誼更非
今宜改省曰部改巡撫曰民政使總理全部民政設四大司屬
焉四大司者改布政使曰理財司掌全部賦稅及種種爲民興
利之政改按察使曰提刑司掌全部訟獄及種種爲民除弊之
政增設勸學司掌全部學校及種種爲民開智之政交鄰司掌
與外國人會議事件裁道員同通等缺府及直隸廳州悉改曰
州州設一牧散廳州悉改曰縣縣設一令州縣均分大中小三

等牧令均由小缺遞升中大缺牧必由令升授牧令必用本部人總督改爲差不常設遇某部有軍務暫設一員節制民政使及海陸軍政使

軍政章第十二

軍政乃百政之一今獨號治軍政者爲武職而治他政者皆號爲文職於誼固已欠通且治軍政之員如兵部堂司各省督撫兵備道等亦號爲文職防營亦可以文員統帶而獨號提督以下外委以上十等綠營員爲武職不以士大夫爲之尤不可解今宜先去文武職之名方可言治軍政提督等職名久爲世所輕賤不可仍用宜改提督曰軍政使部有海軍者設陸海軍政使各一員無者但設陸軍政使一員總兵至外委改爲二等至九等陸海軍官外部陸海軍政使以下可與京部陸海正卿以

下互相升改

民政軍政使秩視部副卿副參將均改三等軍官學校既開十年之後非會考取軍學士出身者不

得任京外軍職

九曹章第十三

縣設戶農工商禮樂刑驛外九曹曹設長一

驛曹掌送往迎來外曹掌與外國人

會議事件縣無外國人者可省

由本縣議院公舉縣中賢者補授曹屬聽其長

自擇曹長可外升令牧內入樞部閣院既設曹長所有縣丞簿典等員概裁

鄉聚章第十四

鄉設一正

鄉之戶數因地制其多寡每縣分鄉多不過八

掌一鄉勸善懲惡諸務由本

鄉公舉百家爲聚聚設一正掌一聚勸善懲惡諸務由本聚公

舉十家爲連連設一正掌一連勸善懲惡諸務由本連公舉如

本鄉聚連無可舉之人聽求之外鄉聚連鄉聚連正可外升令

牧內入樞部關院

九曹長屬鄉聚連正祿均從重

聽訟章第十五

刑審逼招之法起於秦漢酷吏赤縣慘政以此爲最夫已得其情又焉用招未得其情何忍刑逼良懦之民加以輕刑猶必誣服况酷刑乎無益懲惡徒便誣良真可爲痛哭流涕者也按白種諸國皆無刑審法聽訟與衆共之大有三代之風近者日本亦禁刑審師白種法置公民同審又置辨護士令代原被剖陳曲直可謂勇於從善夫險佞者理雖曲而言之動聽拙怯者理雖直而詞不達意官非神人勢多誤判况又有官民語異供胥驚譯之弊乎故聽訟之法不改則怨氣之平無期今宜詔除取招供例燒棄刑審器具示永永不復用聽訟師日本法置公民辨護士則怨氣平而邦本固矣

學校既開十年之後聽訟官必以律學士補授

輕刑章第十六

徐北海曰夫賞罰者不在重而在必行必行則雖不重而民戒不行則雖重而民怠誠哉是言也昔唐虞別衣爲刑其輕至矣而民乃鮮犯者非必行之效歟今日本及白種諸國咸務輕刑以教民仁或竟廢死刑或雖有死刑而死之之法非閉絕養氣使之漸死即對腦槍擊使之立死等死也而視磔斬絞之苦則相去天壤矣夫人犯死罪使之死可也使之求死而不得不可也磔斬絞之刑乃使之求死而不得之刑也仁者所不忍聞而何忍行之是教民忍也夫日英等國刑如此其輕矣然而犯者反甚少我國刑如此其重矣然而犯者反甚多則非必行不必行之異歟將欲必行必先輕刑刑之不輕行無可必理勢然也赤縣俗壞已久固難驟廢死刑然鞅斯遺法必不可用今宜先

除磔斬絞刑及連坐律死刑改用閉刑槍擊新法大小案件概不牽累本犯祖孫父子叔姪兄弟夫婦等倫屬大改刑律務使輕而必行則北海所謂民戒者可致而唐虞之風可漸幾矣

司捕章第十七

將欲除暴安良必以師西法設巡捕爲要務今宜創設司捕局無論城市村落一體密布明暗巡捕京局之長曰司捕上大夫屬於刑部部局之長曰中大夫州局之長曰下大夫縣鄉聚局之長曰上中下士明捕賢者升暗捕暗捕賢者升下士列職官如是遞升至上大夫

懲罪章第十八

每縣宜設男女懲罪所各一區男所用男吏役女所用女吏役以收囚本縣種種惡男女日夜督作苦工工分極苦次苦又次

苦視罪輕重囚限長短如之向受虐害者許入所鞭撻以快積忿但不得致死

重祿章第十九

將欲責廉必先重祿今大學士號正一品而歲俸銀僅一百八十兩殊駭聽聞外官雖有養廉然無論何職其萬不能省之出數必遠過於俸廉之入數况又常遇攤捐欠發減成之舉乎故生今之赤縣不仕則已仕而不居實職則已苟居實職雖聖如周孔清如夷齊爲京官亦不能不受外官之贈爲外官亦不能不剝削軍民者勢也今之所謂陋規無一非由剝削軍民而來然二百餘年但有減收陋規之理學名臣從無不收陋規之理學名臣白人東來聞官恃陋規深致鄙薄此未考祿制之故也假使英美祿制一旦忽改同赤縣則英美之官亦必人人恃陋規爲生矣不議重祿空言責廉猶不議改律空言安良

也律不改良何由安祿不重廉何由資祿重然後可資官廉官不收陋規然後可辦民政軍政今宜大加官祿自五倍至百倍以上如大學士祿須加至百倍以上蓋百倍原數尙止胥爲銀一萬八千兩也督撫原數最豐然亦須加至五倍役之舊有工食而極微者酌加舊并極微而無之者酌給無論官祿軍餉胥役工食一體永絕攤捐欠發減成之舉今局差薪銀雖各處不同然其數總遠過於職俸故局員中潔身自好薪銀之外不收陋規者頗多通商各埠西官所設之巡捕多赤縣人其人皆本與署役同類一充巡捕則品行優於署役幾若天壤此豈非一則并極微之工食而無之一則得甚豐之工食以爲生之故耶彼巡捕工食豐者幾三倍我大學士之歲俸微者猶四倍我翰林編修之歲俸相形之下誠可嘆矣

停捐章第二十

今日本及德美等國幾無不識字之軍民而赤縣乃多不識字之官其官而號爲武者固十之九不識字矣乃至號爲文者亦復十之三不識字焉此其故雖不盡由捐例之開而捐例要爲

一大病源今宜永停大小職至貢監生捐例其不識字之現官
概行罷任別制爵名二十等以獎民之有孝弟諸至行及富而
樂善好施者

泉幣章第二十一

金銀銅三品一也鑄銅圓而不鑄金銀圓吏之阻力大也銀塊
不如銀圓之便夫誰不知然用銀塊則所不便者民也若改用
銀圓則所不便者吏也吏權之世與民權之世事事冰炭泉幣
特其一端今宜聽民股開金類非金類等礦并立泉幣公司多
鑄金銀銅圓流通便民吏稅之護之察之賦入祿出悉改三品
圓朝市齊直不復收發銀塊以絕平折積弊

赤縣宋以前銅圓及日本國寬永通

寶背有文字者舊刻皆極精雅可法

醫藥章第二十二

赤縣古時內外醫科皆極精今內科尙多良醫外科則絕少能者此殆內科可以意會外科必待師傅之故歟歐墨諸國莫不重醫專學以教專科以取故治其術者日新月異不可思議近日本亦列醫大學設男女醫學博士科名又以製藥不精妨醫實大別設藥學士科名非已得科名者不許行醫製藥廣開醫院以治已病遍置專司以治未病爲民衛生不遺餘力今宜師之

道路章第二十三

今國內道路與白種諸國道路較其穢潔頗平不啻地獄天堂之別就國內論北方道路與南方道路較亦不啻地獄天堂之別今宜先於京師開造西式木路或沙路行東西人力馬力各式車以免乘車者傾覆震傷徒行者泥滑塵迷之苦以新氣象

以鼓精神續於南北幹衢支衢大小城邑向無石路者遂漸酌造木沙等路其向有石路者暫緩改造腹地并宜開造鐵路以便運米救饑

前山西大饑合肥使相議造鐵路以工爲賑羣公阻之天津民以道艱殫述米米不能達坐視餓死

數百萬
人慘矣

水火章第二十四

外國巨川其源流或長或等或稍短於黃河者以十計然皆能治之使不病民獨我國永不能治黃河者豈真永不能治哉司河工者永不欲治耳今宜盡裁河官聽沿河居民公舉總董分董自治則不待用西人治水新法而河患必立減十六七矣餘水亦然再開水學科造水學士聽應民董聘以新法治水則河及餘水之患皆可絕而利皆可興矣防火救火之政西國亦最詳密宜與水火保險等政同時做行南漕宜改折色倉漕官宜

盡裁

三業章第二十五

欲振商業必先振農工業俗謂西國專重工商此野說也謂中

國專重農此飾說也今欲振農業必自嚴禁田賦浮勒始我國田賦

陽輕陰重太薄費太繁勒折彼浮勒者亦非得已祿重欲振工業必自勸集股

購機器始中國日用之器細按亦多施機但沿承舊製粗而不精耳同是機器乃必守粗拒精是何義歟機器之學

絕於恩民之世三代以前聖君賢相責務造器以利民用漢陰丈人之談孔子職之矣欲振商業必自盡

裁抽釐局卡始然欲盡行三始尤必自盡去丁幕胥役狐假虎

威之權始一始立三始行然後法東西各國開三業學校造三

業學士漸驅游惰歸入三業不難矣

箸書章第二十六

美國每年女子箸書者多至數千男子更多人文之盛大駭聽

聞蓋由其國獎勸勝流不遺餘力故秀民莫不奮志撰述冀蒙政府許可終身衣食不盡英法日本諸國亦然赤縣自周衰以後箸書與窮愁久結不解之緣故箸書者落落如晨星夫至箸書與窮愁結不解之緣此世界尙復成何世界今宜令各處議院公舉察箸總司分司掌察民呈閱所著之書其有獨得非剽襲者批准刊行給據專利無刊資者由官買其書刊行如此獎勵人文立興矣

正名章第二十七

凡部州縣名宜切附其境內山川或古國號或先哲姓字或現時物產方於學者官者有益今切附者甚少大率非浮泛即訛

謬

浮泛如新疆雲南之類訛謬如直隸江西之類

宜令各處議院以山川古國先哲物

產四例按核舊名分別仍改江河乃二水之名今於南北諸水

及口外國外諸水悉稱某江某河大謬宜悉改稱某水雙名者
悉改單名以歸簡晰如錢塘江宜改稱浙水密西昔比江宜改
稱密水是也古人造江河等字原以工可等字寄土音而加水旁今宜法此增造殊字之國及無字之地水名以便記誦然此法古非獨施於名水今亦非但名水宜師其說詳怨所著六書最初誼及譯書正名論中

廣譯章第二十八

京師及各商口各名城均宜開譯書大局除廣譯白種諸國書
及報外若印度若波斯皆爲亞洲古文明大國若埃及爲非洲
古文明大國亦宜廣譯其書朝鮮日本越南皆與赤縣同文書
無待譯日本所謂和文乃用赤縣字與其國切音字合成譯之
甚易而切用之書及報極多尤宜廣譯此外諸異文小國之書
均宜逐漸擇譯譯書愈廣民智愈開則漢後陽儒陰法之政教
自退處於無權矣

圖書章第二十九

日本及白種諸國莫不廣置大小圖書館藏古今佳圖書任民男女縱覽其大館藏數或乃多至四五百萬冊故通人之多與我國不可同年語今赤縣人文江浙最盛然除幾處名城外每求說文史記等書且不易得況他書乎江浙如此況他方乎故今赤縣之士不幸而不得居遊於幾處有書可讀之城則質雖上智欲學末由即幸而得居遊於幾處有書可讀之城而無力購書仍欲學末由此天下之至悲也今宜令各縣皆置圖書小館一所或多所購藏古今佳圖書任縣民縱覽京師及各商口各名城皆置大館其圖書任國民縱覽則十年以後通人之多必萬倍於今日矣

洪楊亂前杭州鎮江揚州有高宗賜藏四庫全書三閣故乾隆嘉鴻儒十九出江浙流風至今此圖書館之成效也今各處學署非但無學生并無學舍各處書院非但無海外書并無海內書非但無海內稍

難得書并無海內極易得書其有
書之書院全國不過數處可嘆

服色章第三十

今公服雖有等差然等差太簡致清華如修撰而頂戴與帳下
健兒無別或反較小尊顯如卿尹而珠補與市中豪賈無別或
反較小此等差太簡之弊然猶略有等差也若常服則全無等
差矣書入廣衆之場見麗服者羣居羣行不知孰爲官孰爲士
孰爲工商孰爲兵孰爲僕孰爲吏役孰爲俳優女者不知孰爲
命婦孰非命婦孰爲娼妓孰非娼妓見敝服者羣居羣行亦如
是不可辨殆非所以昭榮辱而寓揚抑也今宜令通人博考古
今中外服制詳定各業男女公服分別之式務集萬國之長使
民易行易辨別服宜以色不宜以質以色則易辨以質反
是如定何業人方許衣帛而此業人少果民盡遵
法必大妨蠶桑且業賤而富者必不願衣布業貴而貧者又不
能衣帛勢必不行又如今頂補之別皆不以色故極難辨若一

切別以色則易行且易辨業貴者雖衣布而不掩其榮業賤者雖衣帛而不掩其辱矣白種之民首服皆有人傷目腦光護目與腦我民首服無簪任日光直射人人傷目腦損神智害甚大按赤縣古時首服亦皆有簪此宜速改

旌表章第三十一

無旌表之世界狂榛也無議院而有旌表之世界其旌表萬不能實事求是猶之無旌表也且今旌表律例多未合三代孔子之法流弊甚大今宜令通人改定旌表律例務協至公旌表之權歸於議院庶獸行亂倫之風可斷而魚目混珠之患可除矣

趙宋以前大家婦女不禁再適名臣名儒如范文正其媳亦再適程正叔雖創餓死事小苛刻不情之說徒快一時口舌其胞姪女仍由正叔主婚再適自洛閩遺黨獻媚元明假君權以行私說於是土族婦女始禁再適而亂倫獸行之風日熾逼死報烈之慘日聞夫再適與再娶均為名正言順之舉再適而隱縱為失節失節古誼專指淫亂今嚴禁古聖所許之再適而隱縱古聖所惡之淫亂再適者不能得封贈淫亂者反一體得封贈洛黨私說流殃至此

倫始章第三十二

夫婦爲人倫之始善男娶惡女善女嫁惡男終身受累而女尤苦即同爲善類而性情歧別相處亦不樂今宜改定嫁娶禮律凡有親父母者除由親父母作主外仍須本男女於文據上親填願結不能書者畫押其無親父母者悉聽本男女自主嚴禁非本生之母及伯叔兄弟等強擅訂配趙宋以前夫有出妻之

禮妻有請去之禮離聖未遠尙餘仁俗元明以後禁苛再適

宋

前天子立后亦時擇再適之婦不以爲嫌不以爲諱以再適爲失節創於程正叔而漸成鐵案於專以洛閩私說取士之後帖括之徒經史束閣信末師

於是夫妻姑媳或難共居欲出不能

欲去不得逼成相戕比比皆是殘忍之風於斯爲極今宜定三出五去禮律三出者舅姑不合出夫不合出前妻妾之男女不合出皆由夫作主欲出妻妾者無論因何事故均須用三出中名目禮遣回家不許傷雅五去者其三與三出同其二則一爲

妻妾不合一爲歸養父母皆由妻妾作主欲去者無論因何事
故均須用五去中名目禮辭而去蓋不設五去禮律則爲妻妾
者不幸而遇獸行或盜賊之舅姑與夫無由拂衣自絕歸潔其
身惟有與之俱獸與之俱盜否則必死死又不得旌表此世界
豈非人世界歟人世界何乃有此慘也至若或遇天刑之夫斷
翼嗣續或遇敗產之夫常啼饑寒者猶其苦之輕焉者矣故五
去禮律不可不創設古聖復起必以爲然欲行三出五去禮律
必先使民男女皆通經誼重復唐虞三代風俗使被出者自去
者易於改適如館師署友肆夥然適者娶者毫不蒙誚古人實
是如此
故孔子三世出妻而曾子孟子之妻亦皆以小故被出緣其易
於改適故不嫌出之之嚴若如今之不能改適則出之與殺之
無異夫以小故而殺大聖大賢乎仁然後能實行耳
心者所不忍爲而況大聖大賢乎

析承章第三十三

古者一夫授田百畝餘夫二十五畝爲民析產極清蓋不使惰者病勤者奢者病儉者惡者病善者強者病弱者法至良意至美也自漢後陋儒以親在別籍異財爲薄數世同居爲厚於是家庭之內大抵惡強者惰且奢而樂善弱者勤且儉而苦老父寡母制於子婦孤姪媼嫂制於伯叔弱兄制於強弟善弟制於惡兄同居一門苦樂天壤率天下之人而趨惡強者陋儒之罪也今宜師三代意嚴定勒令各業男女析產律例以扶勤儉善弱而抑惰奢惡強又無子姪承律例最滋骨肉爭端每有寡婦孤兒因頗饒財產被圖承者逼死其本無子之寡婦被例承者逼死更不計其數致婦人以無子爲大戚及早私買異姓之風不能不熾是律例驅民使多亂姓也今宜改定承祀律例凡民無子者任擇同姓五服以外姪輩或姪孫輩及外甥內姪外孫

等一人承祀

漢律外孫可承祀今宜推廣其例

禁不許同姓五服以內承祀則

孤寡枉死之苦可絕而私買亂姓之風亦可清矣

姓字從女從生古所謂姓

皆依母立如姬姜等字皆從女其誼顯然炎黃同父母而別姓十黃帝之子二十五人其得姓者十四人以一父四母而別姓十

二曰季同姓秦漢後識字者少即如姓字之最初之誼數千年來幾無

可人嘆識

救慘章第三十四

赤縣極苦之民有四而乞人不與焉一曰童養媳童養媳貧戶

爲多此等舅姑目不識丁尤多獸畜人女大約被舅強汗者十

之三四被姑虐死者亦十之三四虐傷者且十之六七

聞北方某某等

處爲舅者於媳初來時竟有例作術一曰娼養民盜人婦女賣

宜一月之事吁古聖之鄉今乃至此入娼寮開寮養民酷刑逼娼不從者死復有養民父及後母伯

叔兄弟舅姑及夫刑逼其女其姪其姊妹其媳其妻妾賣娼不

從者死民之無告於斯爲極而文人乃以宿娼爲雅事道學則

斥難婦爲淫賤

洛閩師徒本不能目爲道學茲姑便文從俗稱

夫人沉苦海見而不恤

則亦已矣何忍樂人之苦目爲勝境宿娼爲雅何事非雅且既

以爲雅己之妻女何不許作雅人故宿娼未爲喪心文人之喪

心在以爲雅事也若夫斥爲淫賤則道學之喪心也夫彼身墮

莠手不從則有炮烙寸磔之刑假使正叔仲晦作婦女身同彼

遭遇甯死不從吾未敢必乃責世間婦女以必盡能爲雎陽常

山耶不設身處地而動加醜詆洛閩之責人執斯之定律也夫

彼文人既陰德諸莠男女彼道學又陰護諸莠男女

陰護二字實非刻枉

每見舅姑本夫逼娼致死之獄道學家論斷恒曲怨非人之舅姑本夫有特

姑本夫而不肯爲守節之烈婦雪恨故非人之舅姑本夫有特

無恐逼娼比比非陰護而何噫吾

於是盜賣逼娼諸莠男女之

勢遂橫絕海內而諸弱婦女之苦永無顧問者矣一日婢一日

妾婢妾富戶爲多夫彼特不幸而爲貧女非與吾母吾祖母同類者乎何忍賤等動植之物辱加買賣之名且斷其父母兄弟天性之恩愛耶且婢被主人強汙者十之六七被主母虐傷者亦十之六七虐死者十之三四其苦亞於童養媳及娼妾被主人主母虐傷或死者十之一二其苦較婢爲少然究不能不列入極苦之民類也今宜嚴禁童養媳禁後犯者兩家父母均發囚懲罪所十年其現有童養媳未滿十六者悉令交還母家或送善堂查無舅汙姑虐諸弊俟及年給完姻查有諸弊者除由官將該女擇良改配外仍追懲該獸行舅姑則第一極苦除矣專設巡查逼娼員役嚴密查拘盜賣逼娼諸莠男女審實斬立決改定律例如舅姑本夫確有逼娼情事許本婦格殺無罪并建坊旌表其節其婦女自願爲娼及犯淫到案者由官判令爲

娼別其車服以辱之重其捐稅以因之則第二極苦除矣嚴禁

買婢其現有之婢由官悉數發價代贖改作雇工去留聽便則

第三極苦除矣按英國會由官發出銀錢數千萬遍給國中奴主代贖黑奴又會同美國遣兵船巡海緝奴販

彼於異種人尙施如是之仁我於同種或且同鄉里人忍永任其淪苦度量相越抑何太遠令民欲娶妾者

須備六禮與娶妻同一切與妻敵體不得立買賣文據斷母族

往來無論夫妻妾彼此相害一體抵死則第四極苦除矣妻足一事

爲漢人婦女通苦致死者十之一二致傷者十之七八非但古時所無且又顯背皇朝制度急宜申明禁令以救恒沙之慘

節漸章第三十五

鴉片爲止痛聖藥無病而吸之成癮此人負鴉片非鴉片負人

今赤縣吸此成癮者多若驟下嚴令恐妨病者宜先爲之節漸

期禁絕至賭博一事苟世人尙有爭利之心萬難禁絕宜立官

博場名目令民欲開場者先具父母妻子無阻等情切結到官

查實准開限其數徵其捐欲入場者亦先具父母妻子無阻等情切結到官查實准入亦限其數徵其捐開官博以塞私博此經濟家妙術亦從易之節漸二卦悟出者也

西國舊票之法無損風俗大裨要需

宜做行

同仁章第三十六

今國內深山窮谷之民多種世目之曰黎曰苗曰獠被以醜名視若獸類永不施教絕其仕進地方吏役任意淫虐偶或聚抗輒以叛聞發兵屠掠妄張勞績此多種民言語不通文字不識任屠任掠沉冤莫訴夫此多種民風俗稍殊倫常均有非父死妻其後母之戎狄比瓊州之黎尤極馴良何乃待之如此張廣泗以長圍餓死數十萬席寶田以湘軍焚滅十之八爲彼族大劫其小劫則幾於無歲無之殊大遠乎一視同仁之義矣

至臺灣生番以人爲糧自當別論然聞其俗男不再娶女不再

嫁則亦必可因其已明而啟其未明也

昔亞洲東南羣島人相食者甚多數百年來其

入白種管內者莫不設官嚴禁遺師善誘盡變其俗則臺番食人之俗豈獨不可變哉

若夫秦隴以西漢

回雜處所謂回民無別漢族徒以教規略異官每岐視與漢民訟百難一勝頻釀巨案流血成川尤可憫惻今宜於官書中削除回黎苗猺獠等字樣一律視同漢民惟待臺番不能不殺以止殺然亦宜開學校以漸化之

禮樂章第三十七

自叔孫通采秦儀媚漢主而三代以前君臣相接之禮遂不得復見趙宋後更甚而白種諸國君臣相接猶存古禮首宜則效赤縣雅樂亡久古者士無故不去琴瑟今琴瑟之學幾絕於世有議及學校宜復琴瑟者衆大怪之而日本及白種諸國大小

學校莫不列雅樂於正課依然唐虞三代之風即此一端豈可
勝慨至演戲唱曲人人觀聽幾於非導淫即誣古實爲赤縣民
俗極壞民智極昏之一大病源今宜求唐以前雅樂於日本徵
海內外樂學士爲司樂大夫定樂列校令通人按古今中外史
籍多作傳奇曲本及有韻方言由司樂大夫閱定刊行令業戲
業唱者習之其舊演舊唱曲本擇存近雅者准民演唱壞俗昏
智者嚴禁演唱除優伶不准應試例進之士流嚴禁狎侮斯乃
易民俗開民智之一大要務也

優伶不齒而民俗民
智乃江河日下矣

周末賢者或隱於伶人優伶本
有易俗開智之責豈可賤視自

基礎篇

更律章第一

今律除旗人民人交涉外多沿明律明律源出商鞅蕭何法家

慘刻儒者所嗟欲復唐虞三代之治必自更律始今宜開議律局於京師博徵赤縣及朝鮮日本白種諸國通人討論百王律法得失酌定新律務合孔孟之旨變法家之天下爲儒家之天下其必於更律基之矣

帥信章第二

孔子曰自古皆有死民無信不立有味哉有味哉夫香港一極小荒島耳上海英法美租界縱橫十餘里耳自歸英國及作租界以來百業之盛得未曾有各處蕪萊瓦礫之區一作租界民居無不頓密而內地大城荊棘滿目中原景象尤極蕭條外國招工民趨爭先本國動役民逃恐後沿海之民出洋謀食稍有積蓄率憚言旋依他族如父母畏本管如虎狼豈有他哉赤縣官商鮮克有信而白種官商大概有信故民多願居西官治下

願與西商結交耳今取士功令背朱者斥洛閩之理與孔孟之理固已絕異入仕辦事必謹遵今律例今律例之理與洛閩之理又復絕異官幕吏役密傳心法律外有律例外有例密傳律例之理與印行律例之理又復絕異將安教民信乎今欲使下無不信之民必先使上無不信之官若仍是上下交欺諱深飾巧則今日之赤縣亦永爲今日之赤縣而已矣

敘曰宋恕生浙部南鄱家世數百年無仕者父爲諸生行修於鄉抱懷早逝宋恕之生尊長夢燕故小字燕生生而多病七齡之內幾死者數八齡入塾九齡能爲古今體文談論經史即每與宋元人立異十齡病目幾廢自時以後至於弱冠無歲無病病又多危費暑十七然其間病餘輒事披覽十四齡見王陽明氏遺書深喜其反心不安雖言出孔子未敢以爲是之說是時

外舅孫止庵先生與外伯舅遜學先生方以陳君舉氏葉正則氏之學誘勉後起恕從受業稍識門徑而內兄中頌先生治訓詰學絕精兼通佛典同州金遜齋先生治顏習齋氏顧亭林氏之學陳蟄廬先生治蘇眉山氏陳龍川氏之學其兄仲舫先生治易象數學兼禪學皆曾從問大誼多所啟發然弱冠以前既困於病及至弱冠體稍強矣然拂心之境月異日新俯仰愁嘆生趣幾絕惟持佛號不能他學丙戌遭賊手足無措境益險隘非人所堪幾死者數天幸得脫遂浪迹江海捐境廣心痛自振奮所至輒從師友假四部籍及近譯白人書窮閒暇披覽之弗輟舟車中又所至輒從居者行者隱者名者官者慕者兵者商者工者耕者蠶者牧者漁者鹿者醫者祝者相者卜者主者僕者歌者哭者訪求民所患苦十所競爭風俗奢儉錢幣絀盈販

運暢滯製造竄精形勝遷存水利廢興田野荒闢戶口衰盛稻
麥荳芋茶果藥蔬棉桑麻葛松杉竹蘆雜木煙草油酒鹽魚牛
羊雞豕瓦石金珠大小百物凡民所須郡邑豪俠賢卿大夫黃
冠緇衣劍客文儒淑女貞婦禽兇獸姑劫竊里殘優娼博徒賦
役稅釐浮勒追呼傾貲蕩產嫁母棄孥繫獄蔽罪刑良承誣劬
骨壞折血肉模糊輕則軍流笞杖枷拘重則斬絞淫掠焚屠節
壽規上冰炭敬都既博學審問愼思明辨昏乎若迷昭乎若覺
乃作而嘆曰悲哉儒術之亡極於宋元之際神州之禍極於宋
元之際苟宋元陽儒陰法之說一日尙熾則孔孟忠恕仁義之
教一日尙阻悲哉悲哉知此者鮮矣於是發憤入苾芻蘭若茹
素半載著書數十篇極論其所以然成而藏諸石室俟求曠劫
或遇海內通人志士時共吐抑塞相與嬉笑怒罵痛哭流涕宋

恕之友謂宋恕曰蓋佛家多漸引之方儒氏有據亂之制子盍爲卑議焉宋恕不答久之著卑議四篇六十四章宋恕之友見之謂宋恕曰吾勸子卑何猶高之甚也恕曰嘻更卑於此吾弗能矣非弗能也誠弗忍也夫彼陽儒陰法者流甯不自知其說之殃民哉然而苟且圖富貴不恤以筆舌驅其同類於死地千萬億兆乃至恆河沙數者其惻隱絕也今恕曰食動物比於佛徒惻隱微矣然此弗忍同類之忱自幼至今固結莫解安能絕也嗟乎行年將三十矣又三十年則且老死雜報如家人天如客輪轉期邇慄慄危懼區區惻隱於仁全量如一滴水與大海較夫又安可絕也夫又安可絕也

光緒辛卯冬六齋居士宋恕自敘於東海之濱

六齋卑議終

附錄

留別杭州求是書院諸生詩

光緒辛丑仲夏應杭州求是書院延教授高才生十餘人孟冬辭席諸生留不可季冬病溫寓所六旬不能起諸生頻來候愧感厚意今病痊將如皖作詩八章留別約素旨申忠告末兩章則專舉吾浙先哲以切勉焉

教術深知世所迂來杭一半爲西湖何期諸子不相鄙乃許先生能舉隅夜夜共談心物理朝朝同對質文書菊殘桐盡拂衣

去別意王吳未易圖

諸生所業例定於師畫一責選甲宜乙否觀鼻數息受誤良多自衡承乏取法象山

限規中立經史子集任擇從事於是天性各適思境大闢然與同院中以浮囂爲新閉塞爲正者遂皆冰炭矣頃之勞玉初吏部來作總理於諸同職概續延亦及於衡衡未敢遽受與約先開講堂吐宗旨視離合爲去留吏部不顧即日辭席

六旬危疾幸能愈落盡孤山處士花更惜綠溪負林約客冬與友約春

六齋卑議

附錄

一 敬鄉樓叢書

初遊西湖未忘臨鏡問年華大官落唾生珠玉名士伸眉說國家私

議是非吾豈敢但愁羞見赤城霞

赤城在台近徽州

黃顧顏王麟隱野

梨洲亭林船山三先生書今世多有之習齋先生則幾無聞其名氏者近德清戴君編顏

氏學記極力表章窮唐包馮郭鶴鳴皋非顯湘陰雖有一二小

種行世全集亦其甚晦抗議今世之遺民僻集猶多卓如日本所刊

年眼尤其卓者在魏叔子集皇代諸宗各有豪論史莫如章氏美

實齋先生鄭漁仲一通義似行非行其舉出於司馬子長談經最是

戴君高大東原先生深於性理所著以原善及孟子字義疏證為

大輒加惡聲此為奇冤之一衡發已勿徒驕語毗陵派千里平

原白晝濤外劉之學誠非凡近然春秋文簡師說絕異三家以

獨尊一經於此一經又欲盡闕他家獨尊一傳則其流弊又成狹陋矣毗陵惲子居集亦有可觀

偉哉東海征夷府鼓舞衣冠讀孔書

日本明治前德川氏世襲征夷大將軍數百年開府

江戶節制諸侯右儒興學不遺餘力明治初創行
西法遠得精神識者歸功於德川氏之養士矣
原字辨名幾
艱箸伊藤物部兩鴻儒
伊藤原仁齋著
物部徂徠著
有辨名正義
正墨洛園在
尤力然徂徠於仁齋但欽其德
良知宗自中江唱
良知宗唱於
行而不折其學由是別為兩宗
良川一代多論語家
伊藤後聞
於熊澤書山
論語注誰照井如
德川島子卿之注為最未得見
自是日盛
庚子春從日友假寫本照井燧齋之注一讀
不覺五體投地私謂自何皇至伊物皆弗及也
和采端須甘白
受休隨替者說蓬壺

竺乾論理宗因喻希臘三言竟異同宋後魔禪亡義學歐西切
講振華風大師幸可扶桑覓靈境嗟曾禹域通石棧重連定何
日勉哉先後五丁功
基因明入正理論為印度論學要籍自魏
多問津焉及禪盛而義衰禪入魔而義幾亡淨宗淨禪稍救其
弊然亦不重講義蓋因明之荒久矣獨日本師承不絕至今益
盛禪淨之秀亦皆治之焉
西洋論理學祖希
臘按理氏按理氏立三句法破魔之功極大

儒佛同聲苦勸仁衆生受惠數千春區中久黜實權教海外猶

尊鳴樹倫求譯藏編有西族日本數年前美國開地地球宗教大會

之登壇申佛答難如流本服西哲於是已開館從事矣列科京

校是東鄰日本大學文科列印文明果出慈悲種太息時流誤

認新

曠世超奇出上虞論衡精處古今無精然案頭必須置一分六

經樸學陳君舉三代良臣陸敬輿宜公集極易得案同甫意將

吞北土金華之學龍川集不如東萊之平實而才氣過之初水心

文信冠南都永嘉之學內聖外王陳業外尚多佳集近溫州孫

陳業張楊派至姚江巨橫浦志伊尹之志其論學直截痛快最

兩集浙境從來足壯夫王伯厚困學紀

未除豪氣憐河右西河學派別有深情仰謝山謝山品評宋儒

未有獨爾雅邵能繼樊李姚江學派至梨洲而

忠義之

鄉哲之學世但見其爾雅正
義輕爲小學家失先生矣
春秋龔殆亞嚴顏魏公羊派出入湘浙

而定靈子高絕學知尤少
德清亦治公羊而尤服博章博野說及
父子出

一人王叔奇功立孔艱
德清每入孔祠必指洛閩神主而屬焉
而巳

已則泣其與西士譯說
何原本後九卷奇功也
莫逐盲聾咎先哲哲人誰不一生閒

六齋卑議宋先生平子著清季吾鄉有二大師一爲孫先生
生繡履一即宋先生孫先生所著書皆久有刻本風行海
內外先生所著卑議在光緒甲午以前印本不多知之者
鮮辛丑壬寅之際先生爲杭州求是書院總教習余亦在
杭州時詣請益見詒此書會先生離杭余東游日本返國
未久而先生歸道山余藏此書爲友人借去因而遺失時
以爲憾旋在鄉里搜求重得一冊懼其久復湮沒亟爲重
印以永流傳先生所著書卑議之外有六齋論文六書最
初誼譯書正名論國難記家難記及見於平陽縣志本傳
者凡十數種均未刊行又余藏有先生留別杭州求是書
院學生七言律詩八章原係單行刊本今附錄之以見先
生論學之一斑云民國十七年六月黃羣記